

18. oktober 2022

UKA2022/79

Tarnikkut atugarliorneq aammalu imminut toqunnissamut ernumanartoqarneq akiorniarlugit innuttaasut tarnikkut ikiueqqaarsinnaanissamut pikkorissarfissaannik periarfissiisoqarnissaanut suliniutissatut pilersaarutinik Naalakkersuisut suliaqarnissaat pillugu Inatsisartut aalajangiiffigisassaattut siunnersut. Sammisami attuumassuteqartut, uanilu immikkut piffinni ingerlatsisut kommuunillu suleqatigineqarnissaat Naalakkersuisunit annertuumik anguniarneqassaaq. Periusissiatut pilersaarutit kingusinnerpaamik 1. juni 2023 piareereersimassapput.

(Inatsisartunut ilaasortaq Anna Wangenheim, Demokraatit)

Siunnersuuteqartumut qujalluta, Siumumiit imaattumik oqaaseqassaagut.

Qulequtaq aallaavigalugu mumisitsisinnaagutta Nunatta ineriartoqqinnissaanut pingaarutilerujussuartut isigivara.

Ulloq manna tikillugu Nunatsinni imminut toquttartut amerlavallaarujussuartut tamatta isumaqatigiissutigisinnaavarput. Aamma ulloq manna tikillugu qanoq iliorluta iluatsittumik malunnaatilimmik ikileriartinniissaanut matuersaat nassaarisimanagu kisitsisitigut takusinnaavarput.

Taamatut akuerisinnaangisatsinnik inissisimanerput assigiinngitsorpassuarnik nassugiaatissaqarpoq eqqaasinnaasallu ikingeqaat.

Apeqqut, soornguna inoqatigut imminut toquttartut?

- Meeqqanik kinguaassiutigigut atonerluisarnerit
- Imigassamik aanngajaarniutinillu atueriaaserput
- Sineriassuatsinni inissaaleqinerup aaqqiivigineqannginnera
- Inoqatinik persuttaasarnerit
- Inoqatinik qinngasaarinnittarnerit

Eqqaavakka peqqutaasinnaasut ilaannai qularutigingilarput allat pissutsit aamma taakkartorneqarsinnaapput.

Tamakku inuiaqatitsinnik tarnikkut sanngiillisaatigisagut illuatungilerniarlugit suliniuterpassuarnik aallaartisisoqartarpoq. Nuna tamakkerlugu namminersorlutik oqartussaniit kiisalu kommuninii minnerunngitsumillu sunngiffimmi kajumissutsiminnik suliniuteqarlutik iliuussissat suliniutillu ikinngitsut aallartinneqartartut ingerlanneqartarlutillu ilisimavarput.



Paasisitsiniaanerit, oqallitsitsinerit, pikkorissaanerit, katsorsaanerit, ilisimatusarnerit allarpassuillu suliniutit ingerlanneqartaraluartut suli imminut toquttartut amerlassusiinut naammattumik sunniuteqanngillat.

Taamaattumik pisariaqarsorinarpoq iliuuserisarsimasagut pillugit annerusumik ammasumik eqqartueqatigiittariaqartugut pisariaqarpallu annermik innuttaasunik peqataatitsineq aallaavigalugit sammivissittariaqaripput. Imminut toquttarnermi inatsisartut inersuaaniit kisimiilluta aqqissinnaanngilarput Nunatsinni nunaqqatigut peqatigalugit iluarsisassaqarpugut ataatsimoorluta taamaallaat mumisissinnaagatsigu.

Inoqarfinni ataasiakkaani ilisamasat, ilaqutariit ilisimasaat, ikinngutit ilisimasaat, nunaqqatittalu ilisimasaat, ilisiimatuussutsikkullu ilisimalikkat aallaavigaanni sumiiffikkaartumilu suliniutit sorlaqartillugit inoqarfiit innuttaasullu atugaat pitsaanngitsut mumisikkiartuaarneqarsinnaapput.

Siunnersuuteqartulli aallaavimmini tarnikkut atugarliorneq aammalu tarnikkut atugarliortut pitsaaanerusumik sullinneqalersinnaaneraniq tunaartaqarmat, siunnersuut tamakkiisumik taparserparput.

Siunnersuut Siumumiit taamatut isikkoqartillugu akuerivarput

Hans Peter Poulsen, Siumut